



Herenegun Bilbon eginiko kontzentrazioa, presoek sakabanaketaren aurka.

MIKEL MARTINEZ

Senideak elkarteak zorionak eman dizkio Euskal Herriari

Joseba Egibarrek «probokazioak» uzteko eskatu dio PPri

Erredakzioa / Donostia

Senideak elkarteak, Urte zahar gaueko mobilizazioen datuak kaleratzeaz gain, jendearen erantzunari buruzko balorazioa ere plazaratu du. Balorazioa hiru hitzetan laburtu du: «Zorionak Euskal Herria». Bestetik, Egibarrek PPren jarrera salatu zuen Donostiako kontzentrazioan.

SENIDEAK elkarteak prentsa ohar baten bidez ostegunean egin ziren kontzentrazioei buruzko balorazioa kaleratu zuen. Datu guztiak oraindik biltzeaz zirela, Senideak elkarteak oso arrakastatsutzat jo zituen mobilizazioak, eta balorazioa esaldi bakar batean bil daitekeela esan zuen: «Zorionak Euskal Herria», «Senideak eta udalek deituriko kontzentrazio isilek izan duten erantzuna erabatekoa izan da, eta senideon aldetik euskal gizarte osoa zoriondu nahi dugu», dio Senideen oharrak. Izan ere, Senideen datuen arabera, milaka izan ziren kalera atera ziren herritarrak. Halaber, euskal presoek senitartekoen elkarteak azpimarratu du herenegungo kontzentrazioak «sekula baino anitzagoak» izan direla. Senideak elkartearen aburuz, «honek agerian uzten du euskal gizartearen nahia zein den; euskal presoek Euskal Herriratzeara, alegia».

PPren «probokazioa» deitoratu du Egibarrek

Joseba Egibar EAJko bozeramailea Donostian Senideak elkarteak deitu kontzentrazioan izan zen. Egibarrek kontzentrazioa amaitutakoan komunikabideei egin adierazpenetan Espainiako Gobernuari eskatu zion «probokazioak utz ditzala, gehiengo modu argian azaldu baita legea bete dadin, eta humanitate irizpideak izan daitezkeen gatazkaren aterabideak zuzenduko duten irizpideak». Izan ere, Egibarren aburuz, «probokazioa» da egun gertatzen dena. «PPren aldetik neurtutako probokazioa dago, eta zehazki Barne ministroaren aldetik. Izan ere, gerra batean garaipena lortzeko zorian zegoela uste zuen, eta espero ez zuen, eta ez dakit nahi ote zuen, egoera batean aurkitu da. Su-etena-rekin etsaia desagertu da, eta espetxe politika administrazioari ari da gerra harrapakin

bat balitz bezala, eta hori izugarri txarra da».

Egibarrek adierazi zuen, halaber, presoek Euskal Herriratzearen aldeko jarrera areagotzen joan dela denborarekin, eta mobilizazioak handiagotzen joan direla. Ildo horretan, EAJko bozeramaileak urtarilaren 9an Lizarragaraziko Akordioa sinatu zuten alderdiek antolatutako presoek aldeko manifestazioa izan zuten hizpide, eta bertan jendetza izugarria biltzea espero duela adierazi zuen. «Beste jaun batzuek hala interpretatu arren, ez dugu presionatu nahi, baizik eta gure argudioa adierazi eta kalean azaldu».

laburrean

■ Iñaki de Juana Chaosi eraso egin dio preso sozial batek, eta ondoren bakartu egin dute

Instantzia bat betetzera zihoanean, preso sozial batek eraso egin zion Iñaki de Juan Chaos euskal presoari Puerto I espetxean. Hain zuzen ere, atzetik heldu zion, eta burdinazko ate baten kontra jo zion burua behin eta berri. Presoaren lagunek kontatutakoaren arabera, eraso inolako arrazoirik gabe gertatu zen. Erasoaren ondorioz De Juanak begia galtzeko arriskua zuela eta, erietxera eraman zuten. Han, antiinflamatorioak hartzeko agindu zioten, baina presoak tratamendu hori ez segitzea deliberatu zuen. Erabaki hori «desobedientziatzat» hartu du Puerto Ieko zuzendaritzak, eta isolamendu zigorra ezarri dio De Juana Chaosi. Preso hori Puerto Iera iritsi berria zen, Espainiako Gobernuak Afrikatik penintsulara eraman dituenetako bat baita.

■ Frantziako Berdeek euskal presoek Euskal Herriratzeara galdegin dute

FRANTZIAKO Berdeen alderdiak Euskal Presoak Euskal Herrira kanpainarekin bat egin, eta heldu den urtarilaren 16an eskakizun horri buruz Parisen egitekoa den manifestaldirako deia egin dute. Berdeen buruek Presoen Sustengu Komiteen Koordinaketak egindako deiari baikorki erantzun die, eta bat egin dute manifestaldiaren deiarekin. Berdeen alderdia izanen da Frantzia mailan euskal presoek Euskal Herriratzeara galdeginen duen lehen alderdia. Gainera, gaur egun Berdeak Jospinen Gobernuko partaide dira, Dominique Voynet ministro gisa baitute. Horiez gain, Frantziako hainbat pertsona ezagunek eskatu dute presoek hurbiltzea: Jacques Gaillet apezpikua, Gilles Perraut idazlea, Irene Terrel, Jean Jacques Defelice eta Gisele Halimi abokatu ezagunak eta François Della Suda zein Maurice Rajsfus izendunek, adibidez.

■ Gabi Mouesca berriz eraman dute Lannemezanera

GABI MOUESCA euskal presoak Perpignan-eko kartzelatik Lannemezan-eko zentralera eraman dute berriz ere, asteazken honetan. Duela hiru hilabete atera zuten Lannemezan-etik, esplikatu «zigor diziplinario» bat zela. Bestalde, Landesetako asisetako gorte bereziaren aitzinean epaitua izanen da, Filipe Bidart eta Tiotte Etchebestekin batera, duela hamabost urte Leon-eko kanpinean izan zen tirokadari buruz. Datorren martxoan betekoa dira hamabost urte Gabi Mouesca kartzelan dagoela.

■ Igandean omenaldia Bixente Askasibar preso ohiari

IGANDEAN Bilboko San Inazio auzoan omenaldia eskainiko diote Bixente Askasibar preso ohiari. Omenaldia eguerdiko 13:00etan hasiko da Levante plazan. Askasibar abenduaren 23an atera zen espetxetik, 50 milioiko bermea ordainduta. Bestalde, gaur arratsaldean Azpeitiko Soreasu antzerkian amnistiaaren aldeko ekitaldi bat izango da. Bertan Euskal Preso Politikoen Kolektiboari eta presoek senitartekoei omenaldi bana egingo diete. Ekitaldian, halaber, Lazkano eta Maia bertsolariek hartuko dute parte.